

欽
定
全
唐
文

欽定全唐文卷十八目錄

睿宗 一

受禪制

誠諭天下制

成王千里還舊官制

贈甯嘉勗永和縣令制

定刑法制

加鎮國太平公主實封制

贈太子重俊諡節愍制

贈裴炎益州大都督制

以崔日用參知機務制

授蘇瓌左僕射制

禮葬韋后安樂公主制

贈薛季昶左御史大夫制

追贈燕欽融諫議大夫制

追贈蘇安恒諫議大夫制

追贈張柬之中書令制

褒長安令李朝隱制

追復李多祚官制

貶趙彥昭歸州刺史制

勘責授官制

令西城昌隆公主入道制

令所司舉人制

命皇太子監國制

令僧道並行制

韋安石等罷相制

郊禋大赦制

禁請仗下奏事制

褒恤魏元忠制

訪察官司請託制

頒新格式制

加邠王守禮實封制

加宣城公主實封制

贈吉頊御史大夫詔

立平王爲皇太子詔

葬譙王重福詔

揀擇刺史詔

命皇太子釋奠太學詔

停修金仙玉真兩觀詔

付史館紀皇太子等勸進詔

答皇太子讓禪位表詔

復劉幽求官爵詔

欽定全唐文卷十八

睿宗皇帝

帝諱旦高宗第八子龍朔二年生封殷王乾封元年徙封豫王總章二年徙封冀王初名旭輪改名輪上元三年徙封相王永淳二年又封豫改今名嗣聖元年二月即位武后臨朝天授元年降爲皇嗣仍名輪聖歷元年又封相復今名神龍二年改封安國相王唐隆元年六月復辟延和元年八月傳位元宗在位三年年五十五諡曰大聖貞皇帝廟號睿宗加尊元真大聖大興孝皇帝集十卷

受禪制

門下朕聞自古帝王光膺圖籙則尊尊親親之義著於典
謨諒在至公蓋非獲已我大唐乘時撫運累聖重光當四
海之樂推受三靈之眷命大行皇帝奄棄宮縣痛結仇讎
朕志掃巨逆保寧嗣主今皇帝哀榮在疚託於朕躬勤懇
再三願成茲意朕以不德猥承丕緒念今追昔載感於懷
若涉大川罔知攸濟思荷宗祧之業屬此惟新式揚渙汗
之恩與之更始可大赦天下

誠諭天下制

頃屬昊穹降禍雲馭上僊外戚成挾主之謀奸臣起移國
之計皇太子隆基見危而起補天立極朕方息肩朱邸拭目
清時幸太平之無事期小山之自逸溫王以推崇叔父
固禪萬機隆基以克獎帝圖進登儲貳此則明有日月幽
有鬼神朕不敢執私而廢公違衆而專意也今君臣既定
天下已安欽奉鴻業思臻至理推心兆人之上畢至千秋
之下猶望始終一德無有貳心人其視余天實知我如聞
在外尚有浮言睥睨朝廷窺測間隙或云朕意欲脫屣宸
居或云東宮乃主器非長鳴呼無識曾莫之思昔唐堯帝

摯之弟也昇於帝位王季太伯之少也立爲太子能明俊

德光啟邦家

闕四

屢有流言潛圖廢立止以爲中宗之時

吾乃一王耳憂危不暇今靜禍難安社稷天下利之所謂
非常之事不可以常禮議之

成王千里還舊官制

地有二南載懷敦睦罪非七國奄隔休明故左金吾衛大
將軍兼益州都督上柱國成王千里懿親賢德高才重器
強力幹事獨冠等倫保國义人克成忠義願除凶醜翻陷
誅夷永言淪沒良深痛悼俾復舊班用加新寵可還舊官

贈甯嘉勗永和縣令制

甯嘉勗能重明節事高藥向幽塗已往生氣凜然靜言忠義追崇褒寵可贈永和縣令

定刑法制

門下朕聞唐虞膺錄畫象而人知禁夏商御圖設刑而罪不息周秦以降沿革罕同漢魏而還條流浸廣雖或輕或重一弛一張義在於訓人事期於肅物然則刑辟勿用見稱於昔典法令滋章貽譏於前哲朕情在愛育志切哀矜踈網恢恢實素懷之所尚苛政察察良夙心之所鄙方冀

化致無爲業先刑措近見所司進律令格式一一自觀至
於經國成務之規訓俗懲違之範萬目咸舉一事無遺但
能奉以周旋守而勿失自可懸諸日月播之黎庶何事不
理何化不成先聖憂勤萬務省念庶績或慮須有弛張所
以迅令刪定今旣綱維備舉法制宏通理在不刊義歸無
改豈可更有異同別加撰削必年月久遠於時用不便當
廣延羣議與公卿等謀之今未有疑無容措筆其先律令
格式之本宜早宣布凡厥在職務須遵奉輒造異端妄踰
軌躅者咸禁除之庶用刑符於畫一守法在於無二內外

察察知朕意焉

加鎮國太平公主實封制

門下功定宗社者可以高邁等夷事超縑簡者故能永昭
徽烈鎮國太平公主若華分景穠李流芳以同氣之親鍾
先朝之愛忠孝行己仁明絕倫才無不周識無不綜頃夷
國難爰戴朕躬大義動天懇誠貫日氛祲已廓每聽鳴謙
之詞井田未優復聞辭貴之請朕方至公被物豈以小節
從人宜增土宇更傳帶礪可加實封一千戶

贈太子重俊諡節愍制

朕聞曾氏之孝也慈親惑於疑聽趙虜之族也明主哀而望思歷考前聞率由舊典重俊大行之子元良守器往罹搆間困於讒嫉莫顧鈇鉞輕盜甲兵有此誅夷無不悲惋今四凶咸服十起何追方申赤暈之冤以紓黃泉之痛可贈皇太子諡曰節愍陪葬定陵

贈裴炎益州大都督制

慎終追遠斯乃舊章表德旌賢有光常策故中書令裴炎含和稟粹履信居貞望重國華才稱人秀唯幾成務績宣於代工偶居無猜義深於奉上文明之際王室多虞保乂

朕躬實著誠節而危疑起釁倉卒罹災歲月屢遷邱封莫樹永言先正感悼良多宜追賁於九原俾增榮於萬古可贈益州大都督

以崔日用參知機務制

門下才爲於時以宣可大之業精貫於日以定非常之勛古稱王佐今乃人傑太中大夫守兵部侍郎兼知雍州長史修文館學士騎都尉安平縣開國子崔日用果行育德修辭立誠孝則揚親忠於事主堂堂乎貌暢君子之風諤諤其言蘊大臣之節故能書讀萬卷文窮四始高步登朝

平心待物日者醜孽未殄嘉謀潛斷臨危不顧見義而作
是用底績實所繫賴師兵戰矣京兆晏如宜緝台階之政
式拜掖垣之寵可銀青光祿大夫行黃門侍郎參知機務
學士勲封如故主者施行

授蘇瓌左僕射制

尚書右僕射同中書門下三品監修國史許國公蘇瓌自
周旋近密損益樞機謨猷有成弼贊無怠頃者遺恩顧託
先意昭明奸回動搖內外危逼獨申謹議實挫邪謀況藩
邸寮屬念殷惟舊無德不報抑惟令典可尚書左僕射

禮葬韋后安樂公主制

皇后公主既尊且親有遷幽之義無戮辱之典倉卒之時亂兵所及致不以禮深用憮然宜矜罪戾且慰泉壤韋氏可一品禮葬悖逆庶人可二品禮葬所司準式

贈薛季昫左御史大夫制

故儋州司馬薛季昫剛幹義烈早承先顧驅策中外績譽昭宣有張湯之推舉同汲黯之強直屬醜正操衡除其異已橫加竄責卒至殂亡言念忠冤有懷嘉悼可贈左御史大夫仍同敬暉等例與一子官

追贈燕欽融諫議大夫制

故許州司戶參軍燕欽融先陳忠讜頗列章奏雖干非其位而進不顧身永言奄亡誠所傷悼方開諫路宜慰窀穸可贈諫議大夫仍令備禮改葬特授一子官

追贈蘇安恒諫議大夫制

故蘇安恒文學基身鯁直成操往年抗疏忠讜可嘉屬回邪擅搆奄從非命興言軫悼用惻於懷宜贈寵章式旌徽烈可贈諫議大夫

追贈張柬之中書令制

褒德紀功事華典冊飾終追遠理光名教吏部尚書張柬之翼戴興運謨明帝道經綸審諤風範猶存往屬回邪構成釁咎無辜放逐淪沒荒遐言念勲賢良深軫悼宜加寵贈式賁幽泉可贈中書令封漢陽郡公

褒長安令李朝隱制

夫不吐剛而諂上不茹柔而躪下者君子之事也踐雷必繩登車無屈者正人之務也中大夫行長安縣令李朝隱見義不回強直自遂亟聞嘉政累著能名近者品官入縣有乖儀式遂能責之以禮繩之以愆但闡覽之流多有憑

恃柔寬之代必弄威權每觀載籍常所歎息朕規誠前古
勤求典憲能副朕意實賴斯人昔虞延持皇后之客梅陶
鞭太子之傅古稱遺直復見於今思欲旌其美行遷以重
職爲時屬閱戶政在養人宜加一階用表剛烈可太中大
夫特賜中上考兼絹百匹

追復李多祚官制

以忠報國典冊所稱感義捐軀名節斯在故右羽林大將
軍上柱國遼陽郡王李多祚三韓貴種百戰餘雄席寵禁
營廼心王室仗茲誠信翻陷誅夷賴彼神明重清姦慝永

言徽烈深合褒崇宜追歿後之榮以復生前之命可還舊官仍宥其妻子

貶趙彥昭歸州刺史制

潞州刺史趙彥昭交結回邪諂附凶孽輿金輦貨冒寵祈榮可歸州刺史

勘責授官制

建官惟賢典誥丕訓任人以器先王令圖蓋欲庶政和平萬邦祗乂朕以寡昧克纘休業求衣側席無忘寤寐頃屬奸回擅權撓亂綱紀互相引進遞爲比周黠汗清朝實繇

於此遂使玉石無辨涇渭莫分其制勅授官宜令所司勘
責不因別功遂越賞授先有負犯罔冒得官並量事處分
彰善瘴惡異等區分梟鷹不接羽蒿蘭不同類宣示中外
知朕意焉

令西城昌隆公主入道制

元元皇帝朕之始祖無爲所庇不亦遠乎第八女西城公
主第九女昌隆公主性安虛白神融皎昧並令入道奉爲
天皇天后宜於京城右造觀仍以來年正月令二公主入
道

令所司舉人制

才生於代必以經邦官得其人故能理物朕恭膺大寶慎
擇庶僚延佇思英無忘終食思欲蕭艾咸採葑菲不遺而
商山幽曠渭濱寂寞夫以貴耳賤目殊通方之論捨近謀
遠非應務之術今四方選舉羣才輻湊操斧伐柯求之不
遠其有能明三經通大義者能綜一史知本末者通三教
宗旨究精微者善六書文字辨聲象者度雅曲和六律五
音者習韜略學孫吳識天時人事者暢於詞氣聰於受領
善敷奏吐納者咸令所司博採明試朕親覽焉

命皇太子監國制

惟天生人牧以元后維皇立國副以儲君將以保綏家邦
安固後嗣者也朕纂承洪業欽奉寶圖夜分不寢日昃忘
倦茫茫四海懼一人之未周蒸蒸萬姓恐一物之失所雖
卿士竭誠守宰宣化緬懷庶域仍未小康是以求下人之
變風遵先朝之故事皇太子隆基仁孝因心溫恭成德深
達理體能辨皇猷宜令監國俾爾爲政其六品已下除授
及徒罪已下並取太子處分

令僧道並行制

朕聞釋及元宗理均迹異拯人救俗教別功齊豈於中間
妄生彼我不遵善下之旨相高無上之法有殊聖教頗失
彝章自今每緣法事集會僧尼道士女冠等宜令齊行並
進

韋安石等罷相制

自頃以來政教尤闕時或水旱人多困弊府庫益竭寮吏
日滋僂俛政途罔然如失雖繇朕之薄德固亦輔佐非才
安石可尚書左僕射東都留守元振可吏部尚書懷貞可
左御史大夫說可尚書左丞並停知政事

郊禋大赦制

朕以眇身紹膺鴻緒紫機夙讓黃屋非尊屬天衢未亨王室多難載迫公卿之議遂膺厯數之重凜乎馭朽慄若涉泉自臨萬邦斯爲三載頃者居過密之際莫議郊禋之禮霜露之思日月增深今三元告辰萬物伊始假於清廟昇彼園丘躬耕祈穀率禮斯備太官視膳而牲潔奉常陳樂而邕和爰自降制之始迄於禮畢之際祥風候律瑞日揚光卿雲紛集於壇場甘露傍流於郊甸非常之慶豈獨在予宜因天地之心式覃雷雨之澤可大赦天下

禁請仗下奏事制

設官分職本期致理惟賢是任匪私親昵若使才勝其任
望重於時一日累遷固未爲速如或化工無取考績非明
十年不調豈應論屈頃者官失其序僥倖路開人不務德
惟速是視在職無幾妄希遷陟又每謁見之時多請仗下
奏事不聞公議惟乞榮班王爵與能豈繇干請朕雖遠慙
聖哲多媿大明自臨寰宇斯焉兩載卿士人材皆所知悉
不被昇擢蓋自取之當務責躬何宜往訴且難進而易退
君子格言後已而先人往哲明訓周文多士虞舜舉才克

讓滿朝故稱爲理今位參臺省階列通班唯務趨競餘何足紀朕方欲大革澆浮俾歸淳俗自今已後謁見之日若更有干冒祈榮者雖地處親勲才稱俊秀皆當格之清議一從屏黜崇廉恥之節洽昇平之化

褒恤魏元忠制

故左僕射齊國公魏元忠代協人望時稱國良歷事三朝俱展誠效晚年遷謫頗非其罪宜特還其子著作郎晃實封一百戶

訪察官司請託制

王道至公所以承於天地臣心一德所以固於邦家朕紹膺丕業務存簡惠冀有恥且格無侵于刑如聞百司非常寬縱凡是與奪公然囑請及其不遂即生謗鑠御史縱知亦不彈糾文昌會府衆務所歸御史憲司繩劾斯舉自今已後王公朝士有囑請者所繇官密奏聞若苟相容隱御史訪察彈糾

頒新格式制

朕聞措刑由於用刑去殺存乎必殺明罰峻典自古而然立制齊人於是乎在自我朝建國僅將百年天下和平其

來已久往承隋季守法頗專比襲時安持綱日緩况朕薄德甚莫逮先惟人難理遠不如昔粵從守位三載於茲庶務煩勞不損晷景嘗謂自我作則感而成化痛乎迷俗忘返不威罔懲將至純風先歸重典比者贓賄不息偷濫公行放心未寧禁犯無懼此焉暫革期於永平遂割小慈以崇大體自今已後造偽頭首者斬仍沒一房資財同用廢者並停奪非頭首者絞其承前造偽人限十日內首使盡官典主司枉法受贓一匹以上先決杖一百其緣贓及惡狀被解及與替者非選時不得輒入京城縱家貫在京不

得輒至朝堂妄有披訴如有此色並決杖仍加貶斥其先
在京城者限三日內勒還上下官僚輒緣私情相囑者其
受囑人宜封狀奏聞成器已下朕自決罰其餘王公已下
並解見任官三五年間不須齒錄其進狀人別加褒賞御
史宜令分察諸司若有罪過不能糾獲者貶與外官

加邠王守禮實封制

門下疇庸懋賞允屬親賢利建疏封式固藩屏光祿勳兼
左金吾衛大將軍邠王守禮器資文武節蘊忠貞容範霞
軒孝友天至豈如服儒歸美諒以樂善稱仁載叶推恩增

其井賦作夫屏翰誓以山河

加宣城公主實封制

門下敦教睦親事光彝典分形共氣理冠恒倫宣城公主
慶聯霄極榮開邸館柔闕應圖婉順爲範義歸從子榮匪
求郎國難初平朝獎思及宜加井賦式崇優寵可加實封
五百戶

贈吉頊御史大夫詔

故吏部侍郎同中書門下平章事吉頊體識宏遠風規久
大嘗以經術之才允膺匡佐之委曩時王命中圯人謀未

輯首陳反正之議克創祈天之業永懷忠烈寧忘厥勲可
贈御史大夫

立平王爲皇太子詔

門下舜去四凶而功格天地武有七德而戡定黎人故知
有大勲者必受神明之福仗高義者必爲七鬯之主朕恭
臨寶位亭育寰區以萬物之心爲心以兆人之命爲命雖
承繼之道咸以冢嫡居尊而無私之懷必推功業爲首然
後可保安社稷永奉宗祧第三子平王隆基孝而克忠義
而能勇比以朕居藩邸虔守國彝貴戚中人都無引接羣

邪害正兇黨實繁利口工言讒說罔極韋溫延秀朋徒競
起晉卿楚客交構其間潛結回邪排擠端善居人集木君
子阡危愒日視陰朝不保夕擁羽林萬騎率左右屯營先
害朕躬并及太平公主中外良士咸擬剽屠隆基密聞其
期先難奮發挺身鞠旅衆應如歸呼吸之間凶渠殄滅安
七廟於幾墜濟羣生於將殞方舜之功過四比武之德逾
七靈祇望德昆弟樂推一人元良萬邦以定爲副君者非
此而誰可立爲皇太子有司擇日備禮冊命

葬譙王重福詔

集州刺史譙王重福幼則兇頑長而險詖幸託體於先聖
嘗通交於巨逆不臣不子自絕於天有國有家莫容於代
往者頗不含忍長令幽繫自大行晏駕韋氏臨朝將肆屠
滅尤加防衛洎天有成命集於朕躬永懷猶子之情庶叶
先親之義所以開置寮屬任隆刺舉冀其悛改以怙恩榮
而註誤有徒狂狡未息便即私出均州詐乘驛騎至於都
下遂逞其謀先犯屯兵次燒左掖計窮力屈投河而斃雖
人所共棄邦有常刑我非不慈爾自招咎具聞其故有惻
於懷昔劉長旣沒楚英遂殞以禮收葬抑惟舊章屈法申

恩宜仍舊寵可以三品禮葬

揀擇刺史詔

朕聞彰善癉惡有國之常典糾寬濟猛爲政之通規朕以薄德濫膺明命瞻言賞罰未適時宜至使忠良未進小人未退貪吏未懲流亡未安賢良者未歸懷冤者未理在予之責有愧良深不能致君於堯舜者亦羣公羣士之所恥也卿等將何規補使致咸亨各以狀聞朕當親覽其才望兼優公清特著可以宣風道俗者具以名聞但百司承寬共爲苟且事多憊咎無復紀綱令各本司長官審善惡才

識限十日進狀

命皇太子釋奠太學詔

庠序之興教自元子禮經之最奠始先師中古迄今斯道
無替皇太子天資聖敬日就文明絃誦之業已高元良之
德斯茂自昇儲博望主器承華執經之問雖勤用幣之意
未展今仲丁獻吉有事兩塾備禮三尊宜遵舊章俾緝徽
典

停修金仙玉真兩觀詔

營建創造必有所因豈欲勞人蓋不獲已朕頃居諒闇榮

疲於懷奉爲則天皇后東都建荷澤寺西都建荷恩寺及
金仙玉真公主出家京中造觀報先慈也豈願廣事營構
虛殫力役朕每卑宮菲食夕惕宵衣惟木從繩虛心啟沃
所欲修營兩觀外議不識朕心書奏頻繁將爲公主所置
其造兩觀並停其地便充金仙玉真公主邑司令竇懷貞
檢校所有錢物瓦木一事以付公主邑司收掌諸處供兩
觀用作調度限日送納邑司朕當別處創造終不勞煩百
姓此度修葺公私無損若有干忤當寘于刑

付史館紀皇太子等勸進詔

朕聞御宸極握靈圖爲天下之尊居域中之大者上以奉宗廟下以育黎元迹宜彰於簡編事須聞於朝野朕高宗少子特蒙慈愛顧復之至禮絕諸王運屬上仙時遭家難中宗出藩大聖天后臨朝以權立朕爲嗣朕自惟虛薄固讓中宗誠願上從用寧社稷比居藩邸深嘉清閑不意景龍之間先帝暴棄天下凶族潛計謀覆邦家高祖之業幾墜於地皇太子隆基忠孝天感仗義行誅一夕之間戡定禍難朕當宿夕初不聞知及見事平且悲且慰方與四海同奉嗣君子溫王幼沖頻屬艱疚因發驚悸日夜啼號因

以先聖立朕爲太弟之意令鎮國太平長公主諫議大夫薛稷等奉承先旨朕固誠請至於再三乃使中書舍人蘇頲奉表陳乞襄王便不肯視事避於別宮中外皇皇莫知所向隆基鎮國太平長公主成器範業薛稷劉幽求麻嗣宗等以爲宗廟不可無主萬幾不可暫曠且從人望因定策禁中朕又固辭僉謀卿士得蕭至忠崔湜韋嗣立趙彥昭麻嗣宗薛倣鄭萬均唐駿等同辭勸進以爲幼主之心旣不可奪先聖之旨固不可違事不獲已乃順衆望要盟之言其文猶在朕纂承洪業於今三年謂宗廟郊天大禮

斯備永惟所以獲奉宗禋臨兆人者蓋非朕之本心實乃
鎮國太平長公主皇太子諸王郡公之意也雖禹禹之誠
四海同望然因時致力在此數人已依西漢舊章各酬其
德董狐執筆闕而未書宜勅左右編於史冊

答皇太子讓禪位表詔

汝爲孝友須遵朕命用陟元后無宜固辭汝爲季俗多虞
淳風未洽欲朕回慮兼理萬幾昔舜之禪禹猶躬行巡狩
況朕授汝豈忘家國其軍國大務及授三品已上并重刑
獄當兼省之

復劉幽求官爵詔

劉幽求風雲元感川嶽萃靈學綜九流文窮三變義以臨
事精能貫日忠以成謀用若投水茂勲立艱難之際嘉謨
盈啟沃之初存謙直以不顧爲姦邪之所忌覺萌頗露譖
端潛發元宰見逐讒人孔多旣殄羣凶方宣大化期間政
於經始載登賢於夢卜可依舊金紫光祿大夫守尚書左
僕射知軍國事監修國史上柱國徐國公仍依舊還封七
百戶并賜錦衣一襲

欽定全唐文卷十九目錄

睿宗二

誠勵風俗勅

申勸禮俗勅

簡擇内外文武官勅

賜天師司馬承禎三勅

戒諸王皇親勅

復建桐柏觀勅

賜岱岳觀勅

賜狄光嗣勅

賜武攸緒勅

命皇帝謁享太廟誥

命皇帝巡邊誥

簡補羽林飛騎誥

除宥禁囚誥

遣宣勞使誥

封乳母蔣氏莫氏誥

誅竇懷貞等大赦誥

命皇帝處分軍國政刑詔

與皇帝詔

冊皇帝妃王氏爲皇后詔

冊封皇帝良娣董氏等詔

封郟王鄂王詔

封陝王詔

遺詔

冊平王爲皇太子文

節愍太子諡冊文

冊桂陽郡王楊妃文

北郊赦文

讓禪位表

與劉仁軌書

勞畢構璽書

賜劉幽求璽書

勞解琬璽書

大寶積經序

景龍觀鐘銘

孔子贊

老子贊

漢高祖贊

晉宣帝贊

梁武帝贊

欽定全唐文卷十九

睿宗二

誠勵風俗勅

勅建立州縣列樹官司所以導俗宣風懲奸息暴頃以承平既久中外晏安人懷弛慢之心官無警覺之意遂使潁宋二州屢奏亂常之黨荆并兩府頻言構逆之徒發露雖復數州包藏猶慮未絕此等妖疊尋自伏誅旬日之間驚害良善誠由按察寬縱禁止不明或使無辜陷於非命興言及此深用隱惻自今以後所在州官縣僚各宜用心檢

校或惰於農作專事末游或妄說妖訛潛懷聚結或棄其
井邑逋竄外州或自銜醫占誘惑愚昧諸如此色觸類旁
求咸須防糾勿許藏匿又屬當首夏務在田蠶雖則各解
趨時亦資官府敦勸若能肅清所部人無犯法田疇墾闢
家有餘糧所由官人宜加等第功狀尤異者別外加擢若
爲政苛濫戶口流移盜發罕能自擒逆謀爲外境所告輕
者年終貶考甚者非時解替御史及臺郎出使審加訪察
各以狀聞宜宣示諸州各令所在知悉

申勸禮俗勅

門下朕克纘丕業誕膺景命憲章昔典欽若前王克己勵
精緬思至道宵衣旰食勤修庶政夙夜寅畏匪遑底寧若
涉泉水罔知攸濟頃屬殷憂啓運多難興邦禮章載復品
物咸茂思欲致萬姓於仁壽歸六合於昇平永言政途庶
幾沿革猶恐學校多闕賢俊罕登牧宰不存政理農桑末
加勸導樽俎之儀不習冠婚之禮莫修朕所以當宁興嗟
載懷兢惕者矣庠序者風化之本人倫之先仰州縣勸導
令知禮節每年貢明經進士不須限數貴在得人先聖廟
及州縣學即令修理春秋釋菜使敦講誦之風天下有奇

才異行沈伏不能自達及官人百姓有能諫言時政得失者並令本州責狀封進鄉飲禮廢爲日已久尊德尚齒宏益極深宜令諸州每年遵行鄉飲之禮令有勸慕王公卿士務存訓獎子弟成立則有冠婚婚禮糴糶或存冠禮久爲廢闕自今以後並行冠義責以成人之道使知負荷之難食爲人天農爲邦本綏撫萌庶勸課農桑牧宰之政莫過乎此刺史縣令有課最尤異委廉察使名聞當別加甄擢縣令字人之本明經爲政之先不稍優異無以勸獎縣令考滿考詞使狀有清字無負犯明經及第每至選時量

加優賞若屬停選並聽赴集真如設教理歸清淨黃老垂
範道在希微僧尼道士女冠之流並令修習真寂嚴持誠
行不得假託功德擾亂閭閻令州縣嚴加檢察私度之色
即宜禁斷諸州縣官有不因選序別犯贓賄非時除授官
等皆依倚形勢恣行侵剝如有此色仰州長官錄事參軍
速勘責奏聞訖宜停務待進止仍委吏部兵部速勘責處
分諸州百姓多有逃亡良由州縣長官撫字失所或住居
側近虛作逃在他州橫徵隣保逃人田宅因被賊賣宜令
州縣招攜復業其逃人田宅不得輒容賣買其地任依鄉

原例租納州縣倉不得令租地人代出租課寺觀廣占田地及水碾磴侵損百姓宜令本州長官檢括依令式以外及官人百姓將莊田宅舍布施者在京並令司農即收外州給貧下課戶凡此數事或宜區分繫乎風俗義存獎勸刺史縣令等各申明舊章勉思撫輯罷彫弊之務歸淳厚之源訓導黎蒸宣我朝化書不云乎德惟善政政在養民布告天下咸知朕意

簡擇内外文武官勅

寅亮天工弼諧庶績宰臣之任也彰善癉惡激濁揚清御

史之職也政之理亂實繇此焉朕丕膺鴻緒三年於茲日
旰而食夜分而寢萬乘非樂四海爲憂思欲小康蒸人允
答羣望懲勸之詔歲月相仍然耳不聞彈劾之聲目未覩
剛正之舉豈內外寮吏咸未循公耶將有司迴避隱惡不
聞耶每念於此怒焉如疚言而不行責在薄德知而不奏
誰其過歟御史等不樹朝綱合從屏黜但緣未親處分志
在含忍宜許自新以圖遠効内外文武官有老弱疾患貪
暴侵漁不舉職事材職不相當者三日內各錄狀進外州
刺史上佐多不簡擇内外之職出入須均京官中有材幹

堪理人者量與外官有清慎者與京官

賜天師司馬承禎三勅

皇帝敬問天台山司馬鍊師惟彼天台凌於地軸與四明
而蔽日均入洞而藏雲珠闕玲瓏琪樹璀璨九芝含秀八
桂舒芳赤城之域斯存青溪之人攸處司馬鍊師德超河
上道邁浮邱高游碧落之庭獨步青元之境朕初臨寶位
久藉徽猷雖堯帝披圖翹心齧缺軒轅御歷締想崆峒緬
維彼懷寧妨此顧夏景漸熱妙履清和思聽真言用祛蒙
蔽朝欽夕佇迹滯心飛欲遣使者專迎或遇鍊師驚懼故

令兄往願與同來披敘不遙先此無恙故勅

鍊師道實徵明德惟虛寂凌姑射之遐軌激具茨之絕風
自任鍊藥名山祈真洞壑攀地肺之紅壁坐天台之白雲
廣成以來一人而已足可發揮仙圃黼藻元關海嶽爲之
增輝風霞由其動色弟子緬懷河上側佇巖幽鶴馭方來
鳳京爰降對安期之鳥聞稷邱之琴順風訪道諒在茲日
所進明鏡規制幽奇隱至道之精含太易之象藏諸寶匣
銘佩良深故勅

先生道風獨峻真氣孤標餐霞赤城之表馭風紫霄之上

遁俗無悶逢時有待暫謁蓬萊之府將還桐柏之巖鴻寶
少留鳳裝難駐閑居三月方味廣成之言別途萬里空懷
子陵之意然行藏異跡聚散恒理今之別也亦何恨哉白
雲悠悠杳若天際去德方遠有勞夙心敬遣代懷指不多
及故勅

戒諸王皇親勅

朕聞司牧兆人有國彝訓敦敘九族前王令典念此宗枝
久遭沈翳近從班命庶展才能或授外藩或居內職留念
訪察屬想風謠罕立嘉聲或聞蠹政當官不存於職務處

事多陷於偏私禽荒酒德者蓋多樂善敬賢者全少將性之昏昧違此義方豈朕之不明成爾薄德當從戒慎勉遂悛改如迷而不復自速愆尤已實爲之悔之無及即宜遞相告示以副朕懷

復建桐柏觀勅

勅台州始豐縣界天台山廢桐柏觀一所自吳赤烏二年葛僊翁已來至於國初學道壇宇連接者十餘所聞始豐縣人毀壞壇場砍伐松竹耕種及作墳墓於此觸犯家口死亡不敢居住於是出賣宜令州縣準地數畝酬價仍置

金史卷之三十一
一 小觀還其舊額更於當州取道士三五人選擇精進行業者并聽將侍者供養仍令州縣與司馬鍊師相知於天台山中辟封內四十里爲禽獸草木長生之福庭禁斷採捕者

賜岱岳觀勅

景雲二年六月二十三日皇帝敬憑太清觀道士楊太希於名山斫燒香供養惟靈蘊祕凝真含幽綜妙類高旻之亭育同厚載之陶鈞蓄洩煙雲蔽虧日月五芝標秀八桂流芳翠嶺萬尋青溪千仞蜺裳戾止恒爲碧落之庭鶴駕

來遊卽是玉京之域百祥覃於遠邇五福被於黎元往帝
所以馳心前王由其載想朕恭膺寶位嗣守昌圖恐百姓
之不寧慮八方之未泰式陳香薦用表深衷實冀明靈降
茲休祉所願從今以後浹寓常安朕躬男女六姻永保如
山之壽國朝官僚萬姓長符擊壤之歡魚鳥遂性於飛沈
夷狄歸心於邊徼實希靈鑒用副翹誠今因鍊師遣此不
悉

賜狄光嗣勅

朕念卿家門忠於王室奪卿情禮以展殊思屢表固陳詞

理懇至循環省覽有足可矜今遂所請用勸浮薄待卿情
理云畢更俟後命

賜武攸緒勅

頃以賊臣結黨后族擅權扇動宮闈肆行鴆毒靈祇所感
姦惡伏誅今則宗社乂安天地交泰卿久厭簪紱早慕林
泉守道不回見幾而作興言高尚有足嘉稱但怒用不遷
罪無相及爲善有驗卿之謂與或慮驚疑故令慰謝

命皇帝謁享太廟誥

昔重華嗣德格於文祖高密陟后至於神宗蓋所以敬履

端之元申孝享之道皇帝初嗣大寶允膺休命歡洽人靈
慶溢宗社宜躬祗祀典用展肅雍可以今月四日謁享太
廟所司準式

命皇帝巡邊誥

先王省方所以觀風設教聖人順動所以刑清眚服故叶
時同律虞典之常道喬嶽兪河周詩之盛德自王風不競
茲禮遂亡兩漢本朝有時於邁三國以降日不暇給我皇
家開元首出十代重光寰宇大寧車書無外文祖神宗之
德洽於人心考祥展義之規昭於國典朕祗若丕構寅奉

慶靈夙懷箕穎之心取遂汾陽之志皇帝天錫英武神與
聰明純孝極於安親大功深於濟代自陟元后實總朕師
時政益明彝倫攸敘而邊氓遐阻藩服悠曠式慰來蘇之
懷實允卜征之義加以頃年邊將授任或乖師律以虧軍
威不振今盛德在水元冥御辰天道成於積陰王制崇於
大閱皇帝宜順時巡狩親幸邊陲掌圖修考事之儀典樂
具陳詩之禮西洎河塞東踰燕朔望秩名山肆覲羣后休
農問老誓師訓卒其有牧州典郡功施於人杖節擁旄隱
若敵國者當崇進律之賞加以分麾之命若郡政不舉軍

令莫修聚斂苛細侵削戰士者宜明茲典憲肅以天誅然
後七萃騰裝三軍按節合符釜山之典覽軒帝之遺風勒
騎單于之臺踐漢皇之故事使陰山罷祲大漠無塵其供
帳所資儲擬之費皆令有司支備不得煩人

簡補羽林飛騎誥

往者皇運伊始戎政肇修兩置軍旅初分府衛計戶充兵
纔足周事遂使二十一年入募六十出軍旣憚劬勞咸規
避匿不有整革將何置理其天下衛士取年二十五以上
者充十五年即放出頻經征鎮者十年放出自今已後羽

林飛騎並於衛中簡補

除宥禁囚詔

恤刑緩獄古之通義務本勸農國之常典今陽和布氣膏澤順時凡厥黎萌咸事東作而疲人嬰法自滯圜扉言念於此有軫於懷宜從寬宥使營稼穡其京城內見禁囚除死罪以外並時放免營農天下諸州亦宜準此

遣宣勞使詔

朕恭己無爲留神元默俯順歷數僉謀公卿式命元子祗膺寶位今庶政道新光華肇啓但恐天下至廣未達朕心

故臨遣使臣宣揚朝典宜以膳部郎中蕭瑗爲河南道宣
勞使諫議大夫楊虛受爲河北道宣勞使贊善大夫薛植
爲淮南道宣勞使殿中丞薛麟爲隴右道宣勞使宗正卿
姜晞爲河東道宣勞使司門郎中李誠爲關內道宣勞使
工部郎中高紹爲劔南道宣勞使太子右諭德蕭憲爲山
南道宣勞使宋王府司馬裴綱爲江南道宣勞使諫議大
夫甯悌原爲嶺南道宣勞使

封乳母蔣氏莫氏誥

皇帝乳母蔣氏莫氏等行藉柔良心惟靜順襁褓祗事夙

效於勤勞井邑分封宜申於寵命蔣氏可封吳國夫人莫氏可封燕國夫人

誅竇懷貞等大赦詔

天步時艱王業多難亂常干紀何代無之我國家累聖膺期重光繼統戎蠻慕義遐邇無虞朕以寡昧嗣守丕祚嚮明而理昃景忘劬冀寓內之小康庶羣生之遂性又使家知禮讓人盡忠良不謂姦宄潛謀蕭牆作釁逆賊竇懷貞蕭至忠岑羲薛稷李猷常元楷唐駿唐昕李晉李欽賈膺福傳孝忠僧惠範等咸以庸微謬承恩幸未申毫髮之效

遂興梟獍之心共舉北軍突入中禁將欲廢朕及皇帝以
行篡逆朕令皇帝率衆討除應時殄盡元惡旣戮姦黨畢
殲宗社乂安人神胥悅務申寬大之典宜覃肆宥之恩可
大赦天下自大辟罪已下無輕重咸赦除之其逆人魁首
未捉獲及應緣坐者並不在赦限自餘黨類往還一無所
問布告遐邇咸使知聞

命皇帝處分軍國政刑詔

大寶之尊諒非爲己神器之重必在與能自昔興王率繇
茲道我國家運光五聖業盛百齡大賚洽於人心淳風偃

於區外而道不常泰時更小屯朕以菲薄屬茲多難仰讓王之宿志順公議於羣情丕業旣康天保斯定皇帝神武攸縱睿哲克躋安宗社於綴旒拯生人於在溺用遵內禪令總朕師夙夜在勤政刑益理昨者姦臣構釁潛發禁闈兇黨布於蕭牆飛變聞於帷扆朕慮深倉卒受命討除皇帝遂與岐王範薛王業等勵茲孝心率彼義勇戮鯨鯢於闕下掃欃槍於天路元惡大憝罔不伏誅人神用康功業彌廣信可總璇衡之大政守國家之鴻緒能事備矣朕又何憂自今已後軍國政刑一事已上宜並取皇帝處分其

岐王範薛王業宜各加實封一千戶朕方閑居大庭緬懷
汾水無爲養志以遂素心凡百卿士以洎黎庶宜體朕懷
各盡誠節布告遐邇咸使聞知

與皇帝誥

昆季恩深歡娛共被汝爲留愛天倫其睦斯乃萬方有慶
九族延休言念仁慈固多忻慰

冊皇帝妃王氏爲皇后誥

王者建邦設內輔之職聖人作則崇陰教之道式清四海
以正二儀皇帝妃王氏冠蓋盛門幽閒令德藝兼圖史訓

備公宮頃屬艱危克揚功烈聿興昌運實賴贊成正位六
宮宜膺盛典可冊爲皇后

冊封皇帝良娣董氏等誥

關雎之化始於國風貫魚之序著於大易用能輔助王道
叶宣陰教皇帝良娣董氏良娣楊氏良媛武氏等門襲鐘
鼎訓彰禮則器識柔順質性幽閒美譽光於六寢令範成
於四教宜升徽號穆茲朝典董氏可貴妃楊氏可淑妃武
氏可賢妃

封鄴王鄂王誥

昔在姬劉分王子弟用能本枝碩茂算祀遐長皇帝元子
嗣直嗣謙等若木分輝咸池疏派孝愛成性佩服天經岐
嶷誕靈風儀遐舉奉聞詩之寶訓資樂善之芳規錫命惟
崇已申綠車之寵登庸在運宜開朱邱之藩嗣直可封爲
郟王嗣謙可封爲鄂王

封陝王誥

皇孫之寵禮絕於諸侯帝王之制封殊於列國爰自前代
茲義存焉皇帝第三子嗣昇岐嶷夙成聰明天假東海壽
街之對昔未云奇琅琊日遠之談今可連類允宜昨茲茅

土光被磐石永固鴻業式繼維寧可封爲陝王

遺誥

誥朕聞古之建皇極承大序者雖創業垂統則至公之器固不可違而居常待終則必至之期固不可易況朕以薄德累承聖緒常願致虛守靜用遂其真志於崇高富貴本非所重故三爲天子三以天下讓蓋從人之欲方御於萬邦知子旣明復傳於七廟爰命皇帝寄之司牧觀其體自舜禹以成厥政則朕竄然汾陽無負於時何嘗不問寢以侍膳候顏而順色孝已達於神明愛已兼於君父成朕之

志何慶如斯然朕頃感舊病歟焉大漸聖賢共爾修短其
分古無不歿同謂之歸付託得人夫復何恨屬纊之後三
日便殯以日易月行之自久厚葬傷生可以深誠其喪紀
及山陵制度一依漢制故事社稷務重皇帝不可諒闇自
居小殮之後宜即別處視事軍將及岳牧等所在發哀並
不須來赴百辟卿士孝子忠臣送往事居無違朕意主者
施行

冊平王爲皇太子文

維唐隆元年歲次庚戌七月庚戌朔二十日己巳皇帝若

曰天有不命集寶位於朕躬所以奉若天道建茲元嗣其明聽朕言咨爾平王隆基幼而聰允長而寬博有夙成之量焉夫禮以修外樂以修內者是務於文也春夏學干戈秋冬學羽籥者是兼於武也繫於百姓聞於天下者是由於仁也一日三朝嘗藥侍膳者是資於孝也爾有文武仁孝之德以知父子君臣之道朕甚休之間者賊臣搆逆窺竊神器則我有唐之祚危若綴旒爾義寧家邦忠衛社稷誅其凶惡以之康濟主七鬯者非爾而誰是用命爾爲皇太子古人有言曰爾身克正罔敢不正爾罔不忠惟爾之

忠昭昭臨下不可不畏慎簡乃僚允迪端士恭儉惟德遠
於儉人則萬邦以貞答揚我四聖之鴻烈敬之哉

節愍太子謚冊文

維景雲元年歲次庚戌十月戊寅朔二十九日景午皇帝
若曰咨爾故皇太子重俊業隆繼體才膺守器辨日高視
晉儲防年遐吞漢兩撫軍監國皇基攸固齒胄問安聖圖
惟永頃以讒邪浸潤恩禮踈薄外迫伊戾之謀中啓驪姬
之譖彼則兇計斯甚搖動元良爾乃誠心密運掃除悖德
興晉陽之甲以罪荀寅擁漢闕之兵而誅趙虜嗚呼逆首

雖殄凶黨未清屬投杼生疑亂兵旋及朕代天理物推亡
固存近勦四凶緬懷三善言徵備禮以慰冥魂銀榜山門
畫堂泉室三年遂遠上賓之馭不留千載猶生全節之名
長在存著徽烈歿有餘裕志業若此痛悼良深宜加寵號
用旌不朽今冊謚爾曰節愍太子魂而有靈嘉茲茂典嗚
呼哀哉

冊桂陽郡王楊妃文

景雲二年歲次辛亥十月庚寅皇帝若曰於戲咨爾故桂
陽王妻楊氏誕承華緒光襲懿風性識柔明言容婉嫵觀

詩著範蹈禮成規往應高禒作嬪英邸謹環珮之節珊有
其章勵繁藻之誠恭而式序遣使某持節冊命爾爲桂陽
郡王妃爾其克保彝訓率由茂則以正於家無替厥命往
欽哉

北郊赦文

門下朕聞大事在祀禮極乎郊丘大德曰生道存乎赦宥
故至誠斯感允接神明之休盛典聿修必敷雷雨之施古
先代帝躬祠后土所以崇兼載之功配博臨之義有虞氏
之合禘徧於山川成周氏之從祀逮於林澤西漢汾陰之

惟東洛翠媯之墀雖制度未備而道有可觀曹魏以還數
百餘載蓋設儀而不復或誠信而未孚有其廢之莫得能
舉我國家之受命也承百王之季啓三統之元高祖神堯
皇帝膺籙受圖繼天立極太宗文皇帝弔人伐罪南征北
怨是用拯生靈於塗炭登人物於休和高宗天皇大帝惟
睿作聖垂衣而理大聖天后受託從權當宁而化中宗孝
和皇帝允恭克讓守文御武能致刑措於變時雍朕以眇
身恭荷丕構常恐政理乖中風雨愆期惕慮周於萬戶疚
懷心於一物幸乾坤交泰宗社降靈氣無疵癘之災物遂

生成之性呼韓慕化侍子來庭月支請職名王入貢大荒
同軌瀛海無波俯循涼德載懷寅畏故以歲首肅事禋宗
爰撰令辰親祀方澤採黃圖之舊制定黑時之前基心謀
取則於禮經宥密同規於詩頌三祖登配羣望畢從咸池
之舞在列合鍾之管斯應祥風入候當乎八變之殷瑞日
揚暉屬乎三獻之始臣工助而胥悅兆庶觀而相趨誠敬
克申感慶交集頃緣郊籍已肆眚災貸宥之道未應累降
但精享云缺旣曠代而方循福釐所被思寰宇之同沐宜
因大典式暢洪恩可大赦天下改太極元年爲延和元年

五月十三日昧爽以前大辟罪以下咸赦除之其十惡及劉誠之胡太宰徒侶官人受贓並不在赦限文武官預大禮各賜勲一轉桓彥範敬暉崔元暉袁恕已張柬之等特還其子孫實封二百戶大酺五日

讓禪位表

臣以宗社事重家國情深誅鋤巨逆奉戴嗣主今承制旨猥推宸極在臣虛薄不敢祇膺循環震驚無任感哽

與劉仁軌書

昔漢以關中之事專仗蕭何今者託公亦猶於古所希者

德敬昺廼誠

勞畢構璽書

我國家創開天地再造黎元四夷來王萬邦會至置州立
郡分職設官貞觀永徽之前皇猷惟穆咸亨垂拱之後淳
風漸替征賦將急調役頗繁選吏舉人涉於浮濫省閣臺
寺罕有公直苟貪祿秩以度歲時中外因循紀綱弛紊且
無懲革弊乃滋深爲官旣不擇人非親即賄爲法又不按
罪作孽寧逃貪殘放手者相仍清白潔已者斯絕蓋由賞
罰不舉生殺莫行更以水旱時乖邊隅未謐日損一日微

斂不休大東小東杼軸爲怨就更割剝何以克堪昔聞當
官以留犢還珠爲上今之從職以充車聯駟爲能或交結
富豪抑棄貧弱或矜假典正樹立腹心邑屋之間囊篋俱
委或地有椿榦梓漆或家有畜產資財即被暗通並從取
奪若有固愆即因事以繩羸杖大枷動傾性命懷冤抱痛
無所告陳比差御史委令巡察或有貴要所囑未能不避
權豪或有親故在官又罕絕於顏面載馳原隰徒煩出使
之名安問狐狸未見埋車之節揚清激濁涇渭不分嫉惡
好善蕭蘭莫別官守旣且若此下人豈以聊生數年已來

凋殘更甚卿孤潔獨行有古人之風自臨蜀川弊化頓易
覽卿前後執奏何異破柱求姦諸使之中在卿爲最並能
盡節似卿如此百郡何憂乎不理萬人何慮乎不安卿當
益堅勿爲後顧嘉卿直道今賜袍帶并衣一副

賜劉幽求璽書

頃者王室不造中宗厭代外戚專政姦臣擅國將傾社稷
幾遷龜鼎朕躬與王公皆將及於禍難卿見危思奮在變
能通翊贊儲君協和義士殄殲元惡放殛兇徒我國家之
復存繫茲是賴厥庸甚茂朕用嘉焉故委卿以衡軸胙卿

金史卷之三十一
十一
以茅土然征賦未廣寵錫猶輕昔西漢行封更擇多戶東
京定賞復增大邑故加賜卿實封二百戶兼舊七百戶使
夫高岸爲谷長河如帶子子孫孫與國無絕又以卿志軀
徇難宜有恩榮故特免卿十死罪並書諸金鐵俾傳於後
卿其保茲功業永作國楨可不美歟

勞解琬璽書

卿器局堅正才識高遠公忠彰其立身貞固足以幹事類
張騫之出使同魏絳之和戎職綰文武功申方面勤於王
家是爲國老頃者顧斯側景願言勇退深惜馬援之能未

遂祁奚之請然章疏頻上雅懷難奪今知脫屣歸閒拂衣
高謝固可以激勵頽俗儀刑庶僚永言終始良可嘉尚宜
善攝養以介期頤

大寶積經序

朕聞天之爲大也高上下之容可紀地之爲大也廣縱橫
之數可推則知無去無來不生不滅拯沈淪於沙劫救焚
灼於塵區毒龍懼其威光醉象憚其神力其大則包於宇
宙其小則隱於毫芒七十二君先在陶鈞之內萬八千載
即爲俄頃之間漢日載其通暉周星彰其降誕鷲頭峯下

演金口之微言雞足山中舒玉毫之瑞色干戈不用梵志
摧鋒甲冑無施波旬潰旅闢圓明之淨域啓方便之禪門
慧晷耀於昏衢慈雲清於朽宅無得而稱者其惟正覺乎
然則教自西方法流東夏馬鳴龍樹肇闡瓊編羅什道安
承宣寶偈關中道俗雖傳貝葉之文江左黎元未極蓮華
之旨又以元魏迷於釋典宇文扇於魔風開皇之初暫爲
修建大業之末遽即分崩我大唐之有天下也睿聖重光
文思御歷吞沙靜孽鍊石稱神巢燧執鞭羲農擁篲懸法
王之鏡轉梵帝之輪被正朔於蟠桃混車書於細柳三藏

沙門菩提流志者南天竺國淨行婆羅門種姓迦葉氏也
年十有二外道出家事波羅奢羅學聲明僧法等倫并歷
數咒術及陰陽等年踰耳順遽乃心歸知外法之乖違悟
釋教之深妙隱居名嶽積習頭陀初就耶舍瞿沙三藏學
經論其後徧遊五天竺國高宗天皇大帝聞其遠譽挹其
道風永淳二年遣使迎接天后聖帝應乾司契當宁披圖
令住東都居大福先寺譯佛境界寶雨華嚴等經一十一
部中宗孝和皇帝循機履運配永登樞神龍二年令住京
下於大崇福寺翻譯此經俄屬靈佑虧徵縣區集禍喬嶽

之仙長往茂陵之駕不還朕以庸虛謬膺丕構敬遵前旨
勗就斯編法師尋繹故文發揮新句炎涼不懈曉夕忘疲
舊翻新翻凡有四十九會總其部帙一百二十卷成以先
天二年四月八日畢功進內法師戒珠在握慧炬明心爲
法門之棟梁啓僧徒之耳目伏願上資七廟八百之祚長
延下及萬方億兆之氓恒逸遠邇寧謐朝野歡娛致澆俗
於淳源歸迷生於壽域暫乘紫機之暇聊題紺帙之前所
有會名具於其目云爾

景龍觀鐘銘

原夫一氣凝真含紫虛而構極三清韞祕控碧落而崇因
雖大道無爲濟物歸於善貸而妙門有教滅咎在於希聲
景龍觀者中宗孝和皇帝之所造也曾城寫質闔苑圖形
但名在騫林而韻停鐘簾朕翹情八素締想九元命彼鼓
延鑄斯無射考虞倕之懿法得晉曠之宏規廣召鯨工遠
徵鳧匠耶溪集寶麗壑收珍警風雨之辰節昏明之候飛
廉扇炭屏翳營鑪蕭鶴呈姿蹲熊發狀角而不震侈而克
揚庶其曉散靈音鎮入鵙鷲之殿夕騰仙韻恒流鳩鵲之
闈聳俗聽而咸痊迷方聞而永悟洪鈞式啓寶字攸鐫其

銘曰

紫宸御歷青元樹因傾巖集寶竭府收珍杜夔律應張永
規陳形包九乳儀超萬鈞上資七廟傍延兆人風嚴韻急
霜重音新自茲千歲從今億春懸玉京而薦福侶銅史而
司辰

孔子贊

猗歟夫子實有聖德其道可尊其儀不忒刪詩定禮百王
取則吾豈匏瓜東西南北

老子贊

爰有上德生而長年白髮遺象紫氣浮天函關之右經留
五千道非常道元之又元

漢高祖贊

天造草昧雄圖糾紛赫赫高祖應若興雲秦原鹿喪沛澤
蛇分大風一起南面稱君

晉宣帝贊

仲達猜忌狼顧爲人稱疾迷謬形神不親辛毗仗節蜀將
貽巾委質北面終爲魏臣

梁武帝贊

緬惟梁武九五居尊何爲自屈沈冥釋門災興佛寺兵纏
帝闇竟罹凶逼天道寧論